



Famiglia Oesch en accziun sin tribuna a Laax.

FOTOS A. BEELI



Amiez il vitg ein pign e grond sediverti, sin via, denter stans ed ustrias.

Famiglia Oesch ha carmalau 700

Secunda fin d'jamna pulpida a Laax

■ (anr/abc) La fin d'jamna ha ei dau activitads buca mo en Lumnezia respectiv sil Plaun da Degen. A Laax han ins saviu ballontschar vendergiser culla musica da Oesch's die Dritten. Sonda han tschients persunas visitau il 29avel marcau dil vitg. Il concert ha entschiet allas 20.00. Duront treis uras, tochen allas 23.00, han Melanie Oesch, ils geniturs Hansueli ed Annermarie, culs affons Melanie, Kevin e Mike sco era gl'accordeonist Urs Meier sunau, cantau e divertiu igl auditori. Oesch's die Dritten s'audan tier las formaziuns pli popularas en Svizra. La famiglia dalla Part sura bernesa va dapi 12 onns d'ina tribuna all'autra. Sco il num gi, eis

ei la tiarza generaziun ch'ei activa ella sparta dalla musica populara. Cunzun la feglia Melanie ei l'etichetta dad Oesch's die Dritten.

Ella tenda spel Lag Grond a Laax ei la sguialadra da 32 onns stada el center. Siu «Ku-Ku Jodel» ei caussa da cult. Sper quel ed ulteriuras canzuns enconuscentas ha la gruppa sunau e cantau en auters stils e lungatgs. André Gisler, il directur dall'organisaziun turistica Flem Laax Falera Management (FLFM), ei fetg cuntents cullas frequenzas e culs reus per quella puschida da divertiment per hosps ed indigens. Cumparegliabla eis ella buca cun ina occurrenza dalla stad 1972. Lezza gada haveva l'uni-

on da traffic organisau in concert cun Trio Eugster. La tenda cun varga 2000 plazs fuva stignada plena. Aunc oz ei quella sera en viva memoria a biars. Per la sera cun Oesch's die Dritten ha FLFM giu il sustegn dallas uniun da Laax. Commembras e commembers dil chor viril e dil chor mischedau sco era l'uniun da dunnas ein stai en accziun per survir e menar l'ustria. Rodund 700 persunas han visitau vendergiser-qua quei concert.

La sonda ei lu il marcau dil vitg staus el center. L'uniun dallas fatschentas da Laax, Flem e Falera han envidau da visitar in'ocurrenza che s'auda dafertent tier la puschida dalla stad. L'aura ei sta-

da d'engrau all'Uniun da commerci e mistregn Alpenarena. Per la 29avla gada han ins installau el center dil vitg in menaschi da fiera cun stans, ustria e divertiment musical. Uonn han ins dumbrau 45 stans da tut gener. Naven dallas antiquitads tochen tier vestgadira e vivonda han jasters ed indigens giu ina vasta elezzion, el center eis ei denton stau da musar preschientscha, s'entupar e star pacific. Sco quei che Silvia Thoma, conorganisatura e commembra dalla suprastanza dall'uniun, ha informau, ha l'ustria da fiasta vendiu sonda da miezgi 850 purziuns gentar. Thoma e Susanne Kislig ein stadas en accziun per la 12avla gada sco conorganisaturas dil marcau dil vitg.



100 onns
Lia Rumantscha
1.-18 d'avust 2019
Zuoz

Marcellino Giger (50),
specialist da banca,
Sedrun



Tgei munta il romontsch per Vos?

Romontsch ei tier mei omnipresent. En romontsch s'exprimel jeu, en romontsch patratgel jeu ed en romontsch siemiel jeu. Per mei ei romontsch in toc identitad ed in scazi cultural.

Co promovis Vos il romontsch?

Jeu sesprovel da tschintschar romontsch tier mintga pusseivladad. Seigi quei en famiglia, en fatschenta ni era en auters discuers che sedattan el decuers d'in di.

Tgei avegnir ha il romontsch?

Jeu creiel ch'ins vegni aunc a discuerer biars onns romontsch. Nua ch'jeu hai in tec pli gronds dubis ei il lungatg a scret. Il scriver romontsch vegn probablamein ad ir a piader in tec damai ch'ei vegn schon oz scret bia pli pauc romontsch ch'avon onns. Ch'ins vegni d'evitar quei cul romontsch grischun sco lungatg da scartira dubetel jeu fetg.

www.100onns.ch

reclama

Topaktuell
von Montag
bis Freitag

Nachrichten
näher an
Ihrer Region

Das Nachrichtenmagazin
«SO informiert» ab 18 Uhr
auf TV Südostschweiz.

Interess per cultura e historia

Possessurs da secundas habitaziuns el museum a Sedrun

■ (anr/hh) La Cuminonza d'interess dils possessurs da secundas habitaziuns da Tujetsch ed il Forum cultural Tujetsch han envidau ad ina viseta el Museum La Truaisch a Sedrun. Igl interess persuerter ei staus gronds. Igl atun 2015 ei la cuminonza vegnida fundada. Sia finamira primara: Tgirar il contact cun las autoritads communalas e las organisaziuns turisticas. In dils motivs principals dalla fundaziun dalla cuminonza ei la nova lescha davart las taxas da turissem stada. Ils possessurs da secundas habitaziuns che vegnan clamai pli fetg alla cassa dapi l'introducziun dalla lescha han vuliu saver nua che lur daners mondien. Dapi la fundaziun dalla cuminonza han els lu era saviu procurar per dapli trasparenza en quei grau. La cuminonza dat denton era peisa al contact cun la populaziun ed in da ses scopps ei era da saver dapli dalla cultura e la historia dalla vallada. Per quei motiv ha la suprastanza envidau la sonda vargada ad in inscunter el Museum La Truaisch a Sedrun.

Interessant referat

Communablamein cul Forum cultural Tujetsch ha la cuminonza, che vegn dil

remiment presidiada dall'antieriura cussegliera naziunala Vreni Müller-Hemmi, aranschau la sentupada. A quella ein 60 persunas separticipadas, la gronda part possessuras e possessurs da secundas habitaziuns, mo era entgens indigens. Igl ei aschidadir igl arranschament da partenza ad ina collaboraziun dallas duas organisaziuns sil sectur dalla cultura. Enteifer la suprastanza dalla cuminonza ei Markus Müller-Hemmi responsabel per la cultura. Il responsabel pil museum, Tarcisi Hendry, ha referiu davart la historia, cultura, cuntrada ed il Tuatschin(a). Aschia han las participontas ed ils participonts dalla sentupada survegniu in'investa en fatgs che pertuccan la cuntrada dalla Val Tujetsch, la baselgia sco cuntrada sacrala, il casti da Putnengia, mo era il lungatg romontsch ed il dialect tuatschin. Hendry ha aschuntau entgens eveniments historics sco l'invasiun dils Franzos igl onn 1799, l'emigraziun, la scola, la Via Alpsu, la viafier, las auas ed ils mirs da fermada, il svilup turistic, la Neat ni era la situaziun actuala culla arena da skis Andermatt, Sedrun e Mustér. Fotografias e films han cumplettau la presentaziun.



Derya Güre separticipescha al Musical Surselva. Ella gioga ina dallas rollas principals.

FOTO G. VENZIN

«Ina buna variaziun»

Derya Güre da Reichenburg separticipescha al Musical Surselva

DA GIUSEP VENZIN / ANR

■ El musical «En 80 dis entuorn il mund» confrunta Phileas Fogg duront siu viadi entuorn il mund sin sfidas ed aventuras. Quellas sfidas damogna il galantun engles cun agid da siu cumpogn «Passepartout». Il Musical Surselva presenta quest atun la historia scretta da Jules Verne e Derya Güre gioga «Passepartout». Igl ei ina dallas rollas principals giugada d'ina giuvna talentada. Derya dumbra 26 onns e habitescha a Reichenburg denter il Lag da Turitg ed il Lag Rivaun. Igl engaschi al Musical Surselva numna l'emploia da mercantil sespecialisada silla contabilitad ina buna variaziun tier la professiun. «La contabilitad lai buca tonta libertad alla creativitat sco il musical.»

Rescruvretg in talent

Duront il temps da scola ha Derya giu pliras ga la caschun da giugar teater. La

giuvna cun ragischs tercas conceda: «Quei ha mai schau mei libra mei.» En in «workshop» da musical cun Roland Körner, il menader dil project «En 80 dis entuorn il mund» ha Derya udiu dil Musical Surselva ed ha seschau perschuaader digl engaschi a quei project.

Allas emprovas ei la giuvna da lungatg tudestg confruntada cun giuvnas e giuvens da lungatg romontsch. «Negin problem, jeu sun acceptada sco in'indigena.» Tochen dacheu enconuscheva la Glarunesa aunc buca la Surselva. «Jeu enconuschevel Cuera e Tavau, mo en Lumnezia erel jeu aunc mai stada.» Quei vegni denton buca a restar aschia, ha la giuvna che numna «viandar» in da ses hobis, detg. «Jeu vegn segir a descuvierer la Lumnezia da spassegiadas liungas.»

In auter hobi da Derya Güre ei senuadar. Quei sport ha ella absolviu sco sportista da prestaziun.



Possessur(a)s da secundas habitaziuns da Tujetsch ed indigens ein s'informai la sonda vargada davart la cultura e la historia dalla Val el Museum La Truaisch a Sedrun. MAD